



Broj: 01-02-26-010-8-II/06
Sarajevo, 22.11.2006. godine

Na osnovu člana 25. stav (1) pod e), člana 42. stav (1) pod d) u vezi sa čl. 12., 14., 16. i 18., te u skladu sa članom 24. stav (2) Zakona o konkurenciji ("Službeni glasnik BiH", broj 48/05), po Prijavi namjere koncentracije između kompanije STADA Arzneimittel AG, Stadastrasse 2-18, Bad Vilbal, Savezna Republika Njemačka zastupanim po advokatu Seadu Miljkoviću, Fra Anđela Zvizdovića 1, Sarajevo, kompanije Hemofarma a.d. Vršac – Hemofarm d.o.o. Banja Luka, Bosna i Hercegovina, zaprimljena pod brojem: 01-02-26-010-II/06 od 21.07.2006. godine, Konkurencijsko vijeće, na 36. (tridesetšestoj) sjednici održanoj dana 22.11.2006. godine, je donio

R J E Š E N J E

1. Ocjenjuje se dopuštenom koncentracija koja će nastati na tržištu proizvodnje i prodaje specijalizovanih (generičkih) farmaceutskih proizvoda u Bosni i Hercegovini kao rezultat preuzimanja kompanije Hemofarma a.d. Vršac, Republika Srbija – Hemofarm d.o.o. Banja Luka, Bosna i Hercegovina od strane kompanije STADA Arzneimittel AG, Stadastrasse 2-18, Bad Vilbal, Savezna Republika Njemačka kupovinom većine njegovih dionica putem javne ponude.
2. Rješenje o koncentracija iz tačke 1. upisuje se u Registar koncentracija.
3. Ovo Rješenje je konačno i bit će objavljeno u "Službenom glasniku BiH" i službenim glasilima entiteta i Brčko Distrikta Bosne i Hercegovine.

O b r a z l o ž e n j e

Kompanija STADA Arzneimittel AG, Stadastrasse 2-18, Bad Vilbal, Savezna Republika Njemačka zastupana po advokatu Seadu Miljkoviću, Fra Anđela Zvizdovića 1, Sarajevo (u daljem tekstu: podnosilac Prijave) je podnijela Konkurencijskom savjetu Prijavu namjere koncentracije kojom STADA Arzneimittel AG, Stadastrasse 2-18, Bad Vilbal, Savezna Republika Njemačka namjerava kupovinom najmanje (..)**%¹dionica kompanije Hemofarm a.d. Vršac, Republika Srbija, a samim tim i Hemofarm d.o.o. Banja Luka, Bosna i Hercegovina postati njen većinski vlasnik.

Prijava namjere koncentracije je proizašla kao obaveza na osnovu člana 14. stav (1) tačka a) Zakona o konkurenciji (u daljem tekstu: Zakon) jer je ukupni godišnji prihod učesnika koncentracije na svjetskom tržištu iznosio preko 100.000.000,00 KM po završnom računu u godini koja je prethodila koncentraciji.

Podnosilac Prijave ima obavezu da prijavi koncentraciju Konkurencijskom vijeću jer su učesnici koncentracije ostvarili sljedeći prihod na dan 31.12.2005. godine:

¹ (..)** podaci su poslovna tajna

Tabela 1.

Ukupan prihod (KM)	STADA Arzneimittel AG	Hemofarm
Svijet	(..)**	(..)**
Bosna i Hercegovina	(..)**	(..)**

Prijava namjere koncentracije je podnesena Konkurencijskom vijeću dana 21.07.2006. godine.

Konkurencijsko vijeće, dana 16.10.2006. godine, je dostavio podnosiocu Prijave Potvrdu o prijemu kompletne i uredne Prijave broj 01-02-26-010-6-II/06, u skladu sa članom 30. stav (1) tačke a) i b) Zakona.

Prijava namjere koncentracije podnesena je i nadležnim organima u SR Njemačkoj, Republici Srbiji i Makedoniji.

Pravni osnov koncentracije

Pravni osnov za Prijavu namjere koncentracije je sticanje većinskog dijela dionica putem javne ponude o preuzimanju koju je objavila kompanija STADA Arzneimittel AG, Stadastrasse 2-18, Bad Vilbal, SR Njemačka dana 20.07.2006. godine u svrhu kupovine najmanje (..)**% u kompanije Hemofarm a.d. Vršac, Srbija – Hemofarm d.o.o. Banja Luka, Bosna i Hercegovina.

Učesnici koncentracije i njihova relevantna obilježja

Učesnici koncentracije su kompanija STADA Arzneimittel AG, Stadastrasse 2-18, 61118 Bad Vilbal, SR Njemačka i kompanija Hemofarm a.d. Vršac, Republika Srbija – Hemofarm d.o.o. Banja Luka, Bosna i Hercegovina.

Kompanija STADA Arzneimittel AG je osnovana 1895. godine u Drezdenu kao zadruga farmaceuta. Njena djelatnost podjeljena je u četiri segmenta i to: generičke preparate, komercijalne proizvode, specijalizovane farmaceutske proizvode i ostalo.

Generičkim lijekovima se ostavljuje (..)**% prometa kompanije STADA u fiskalnoj 2005. godini što je njen najveći segment osnovne djelatnosti.

Komercijalni proizvodi, uključujući lijekove ili proizvode za zaštitu zdravlja koje grupacija nudi pod zaštitnim imenom jedinstvenim za taj proizvod i koji su, za razliku od generičkih preparata, pozicionirani prema zaštitnom imenu, a ne prema cijeni ostvaruju (..)**% prometa u prethodnoj godini što predstavlja drugi po veličini segment osnovne djelatnosti kompanije STADA.

Specijalizovani farmaceutski proizvodi su treći i ujedno najmanji segment osnovne djelatnosti kompanije STADA sa učešćem od (..)**% u prethodnoj godini i u fazi su širenja. Ovdje je riječ o proizvodima za koje su određene posebne barijere za ulazak na tržište, polja indikacija ili posebni marketinški ili prodajni uslovi.

Ostale aktivnosti STADA prvenstveno uključuju komercijalno poslovanje koje se vrši u pojedinačnim zemljama zbog specifičnih struktura tržišta sa ciljem podržavanja marketinških aktivnosti u pojedinačnim segmentima osnovne djelatnosti. U 2005. godini ukupan promet STADA u ovom segmentu iznosio je (..)**% od njenog ukupnog prometa.

Hemofarm a.d. Vršac, Srbija je međunarodna farmaceutska grupacija sa strukturom akcionarskog društva. Proizvodnja i plasman lijekova su osnovne djelatnosti, a proizvode sve forme lijekova. Paleta lijekova obuhvata gotovo sve farmakoterapijske oblike. Od ukupne

proizvodnje, trećina se plasira na tržišta Rusije, susjednih zemalja, Evropske unije, zemalja razvijene Afrike i Bliskog Istoka. Od 1991. godine Hemofarm a.d. Vršac je započeo sa osnivanjem preduzeća i marketinških punktova pa je tako danas prisutan u Temišvaru, Bukureštu, Skoplju, Ljubljani, Banja Luci itd.

Preduzeća unutar Hemofarm grupacije, također, su aktivna na polju proizvodnje i distribucije farmaceutskih proizvoda, posebno na polju generičkih preparata.

Hemofarm u 2005. godini oko 69% ukupnog prometa je ostvareno na području Srbije, a dok je izvoz u Rusiju iznosio 56%, u Bosnu i Hercegovinu 14%, u Alžir 9%, Republiku Rumuniju 7% i u Makedoniju 4%.

Promet ostavljen aktivnostima koje se tiču proizvodnje i distribucije multivitaminskih proizvoda, veterinarskih proizvoda i proizvoda za zaštitu bilja u 2005. godini iznosio je (..)**KM, odnosno (..)**KM, dok je od usluga inženjeringa iste godine ostvaren promet od (..)**KM.

Hemofarm Proizvodnja farmaceutskih proizvoda d.o.o. Banja Luka je registrovano supsidijarno društvo Hemofarma a.d. Vršac čija je glavna djelatnost proizvodnja farmaceutskih proizvoda i veleprodaja farmaceutskih i pomoćnih proizvoda.

Prisustvo učesnika koncentracije na tržištu Bosne i Hercegovine

Kompanija STADA je aktivna u Bosni i Hercegovini putem svog predstavništva u Sarajevu pod nazivom «STADA PHARMA INTERNATIONAL GmbH» Savezna Republika Njemačka – Predstavništvo u Bosni i Hercegovini, Hamdije Čemerlića 11/2, 71 000 Sarajevo, Bosna i Hercegovina. U skladu sa zakonima Bosne i Hercegovine Predstavništva nemaju status pravnog lica njegova aktivnost, između ostalog, je pružanje podrške zastupanju interesa kompanije STADA pri poslovanju u Bosni i Hercegovini.

Promet kompanije STADA u 2005. godini u Bosni i Hercegovini iznosio je oko (..)**KM, a ostvaren je poslovanjem četiri distributera i to:

- Velfarm d.o.o., Zlatnih ljiljana 77, Gračanica
- Medimpex Sarajevo d.o.o. Igmanska 38, Vogošća
- Pharmanova BEL d.o.o., Stefana Dečanskog bb, Bijeljina
- Tuzla Farm d.o.o. Rudarska 72, Tuzla

Hemofarm Proizvodnja farmaceutskih proizvoda d.o.o. Banja Luka, fabrika za proizvodnju čvrstih formi lijekova je kompanija-kćerka Hemofarm koncerna, započela je sa radom u februaru 2003. godine kao prva kompanija lijekova u Republici Srpskoj i do sada je registrovala 242 lijeka u Republici Srpskoj.

U strukturi vlasništva kompanije Hemofarm Proizvodnja farmaceutskih proizvoda d.o.o. Banja Luka učestvuju Hemofarm a.d. Vršac sa (..)**%, Vlada Republike Srpske sa (..)**% i Čajevac Sistemi sa (..)**%.

Hemofarm Proizvodnja farmaceutskih proizvoda d.o.o. Banja Luka je u fiskalnoj 2005. godini ostvario ukupan prihod u iznosu od (..)**KM, dok je ukupan prihod koji se odnosi na prodaju farmaceutskih proizvoda iznosio (..)** KM.

Pored Hemofarm Proizvodnja farmaceutskih proizvoda d.o.o. Banja Luka kao glavni učesnici u sektoru generičkih farmaceutskih proizvoda u Bosne i Hercegovine sa znatnim učešćem na tržištu su Bosnalijek Sarajevo - Bosna i Hercegovina, Krka Novo Mesto - Republika Slovenija, Lek Ljubljana - Republika Slovenija, Pliva Zagreb - Republika Hrvatska, Alkaloid Skoplje - Makedonija, Galenika Beograd - Republika Srbija itd.

Definiranje relevantnog geografskog tržišta i tržišta proizvoda

U analizi relevantnog tržišta Konkurencijsko vijeće ocjenjuje dopuštenost predmetne koncentracije utvrđujući strukturu relevantnog tržišta i tržišno učešće učesnika koncentracije na relevantnom tržištu.

Relevantno tržište čini tržište određenih proizvoda ili usluga koje su predmet obavljanja djelatnosti učesnika koncentracije na određenom geografskom tržištu.

Relevantno tržište proizvoda u konkretnom slučaju je proizvodnja i prodaja specijalizovanih (generičkih) farmaceutskih proizvoda. Postojeći farmaceutski proizvodi koji uključuju generičke preparate čine finalne farmaceutske proizvode koji se koriste u liječenju oboljenja i bolesti ljudi. Originalni lijekovi i generički preparati su biološki identični i često su međusobno u potpunosti zamjenjivi sa stanovišta korisnika ili ljekara koji izdaje recept za takav preparat.

Budući da učesnici predmetne koncentracije djeluju na cijelom teritoriju Bosne i Hercegovine, relevantno tržište u geografskom smislu smatrat će se cijeli teritorij Bosne i Hercegovine.

Slijedom navedenog, pod relevantnim tržištem u predmetnoj koncentraciji podrazumjeva se proizvodnja i prodaja specijalizovanih (generičkih) farmaceutskih proizvoda na cijelom teritoriju Bosne i Hercegovine.

U analizi relevantnog tržišta učesnika predmetne koncentracije, odnosno u analizama i procjenama tržišnih učešća, korišteni su podaci Agencije za lijekove Republike Srpske, Registra lijekova Federacije Bosne i Hercegovine, kao i podaci iz Prijave namjere koncentracije.

Procjena koncentracije

Prema podacima iz Prijave namjere koncentracije STADA ima manje od 1% udjela na tržištu farmaceutskom sektora Bosne i Hercegovine, te ne spada u vodeće kompanije u ovoj djelatnosti. Aktivna je samo na tržištu generičkih preparata putem svojih distributera koji su naprijed navedeni i ukupan promet ove kompanije u 2005. godini iznosio je manje od 1% na ukupnom bh tržištu farmaceutskih proizvoda.

Kompanija Hemofarm a.d. Vršac, Republika Srbija preko kompanije Hemofarma d.o.o. Banja Luka u Bosni i Hercegovini, takođe, je aktivan samo na tržištu generički preparata.

Prema podacima Agencije za lijekove Republike Srpske kompanija Hemofarm a.d. Vršac registrovao je u Republici Srpskoj 242 lijeka, a STADA 5 lijekova, što čini 17,38% ukupnog broja registrovanih lijekova u Republici Srpskoj, a prema podacima iz Registra lijekova Federacije Bosne i Hercegovine kompanija Hemofarm a.d. Vršac ima 4 registrovana lijeka.

Prema podacima iz Prijave namjere koncentracije Hemofarm Proizvodnja farmaceutskih proizvoda d.o.o. Banja Luka ima 9% udjela na tržištu cjelokupnog farmaceutskog sektora u Bosni i Hercegovini.

Navedenom koncentracijom tržišni udio proizvodnje i prodaje u farmaceutskom sektoru na teritoriji Bosne i Hercegovine kompanija STADA će imati udjel oko 10%.

Cijeneći i analizirajući sve utvrđene podatke i činjenice u postupku donošenja predmetnog Rješenja, a cijeneći izvedene dokaze kako pojedinačno tako i međusobno povezane,

Konkurencijsko vijeće je utvrdio da namjeravanom koncentracijom privrednih subjekata neće doći do sprječavanja, ograničavanja ili narušavanja tržišne konkurencije na relevantnom tržištu u pogledu specijalizovanih (generičkih) farmaceutskih proizvoda, već će ista dovesti do pojačane tržišne konkurencije u Bosni i Hercegovini.

Radi toga Konkurencijsko vijeće je ocijenio predmetnu koncentraciju dopuštenom bez provođenja postupka i odlučio kao u dispozitivu ovog Rješenja.

Administrativna taksa

Na ovo Rješenje podnosioc Prijave, u skladu sa članom 2. tarifni broj 107. stav (1) pod d) 1) Odluke o administrativnim taksama u vezi procesnih radnji pred Konkurencijskim vijećem ("Službeni glasnik BiH", broj 30/06), je obvezan platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

Pouka o pravnom lijeku

Ovo Rješenje je konačno i protiv njega nije dopuštena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovog Rješenja, odnosno od dana njegovog objavljivanja u "Službenom glasniku Bosne i Hercegovine".

Predsjednik

Gordan Raspudić